



Jumat, 19 Maret 2021
Ogen: Jeremia 50 : 4-10



Dibata Singaturkensa



Syair lagu : Lit nge pagi malemna oh nande
Erlayas nge pagi dungna oh bapa
Gia genduari mesui kal atendu

Enda sada ndenden sekalak anak i bas pengarapenna maka lit me pagi paksana malem ate orangtua e anemgia tupung paksa perjuangan e megati nge teriluh. Arah ende-enden enda pe kita ngidah maka melala nge perjuangan siman alanken kita tapi la pernah kita itadingken Tuhan, lit nge lalap serpang puluh i bas buena perbeben geluhta.

Ketedeheh ate bangsa Israel mulih ku negerina kenca 70 tahun dekahna ia i bas penderitaan i negeri Babil, si enggo inanami antar generasi, tangis ia ndarami Tuhan janah nungkun dalam ku Sion, ilakokenna sada perpadanen maka lanai ia ngelanggar kai si ikataken Tuhan.

IandingkenNa bangsa Israel e genduari bagi biri-biri si enggo papak i datas deleng, lanai ietehna dalam mulih ku kutana.

Tema renungenta: Dibata singaturkensa, enda jadi sada pergegeh man banta, i bas papak ndai pe lit denga petunjuk i bas Tuhan nari nuduhkan dalam gelah mulih seh ku Negeri Israel.

Bage me pe kita ngerana kerna kuasa Tuhan, melala enggo sidalani proses kegeluhenta, maun nggo kita ndauh i bas dalam Tuhan nari, nggo papak dengen enggo buntu, lanai si eteh dalam ras kai siarus silakoken maka banci kita lepas i bas belenggu si ngerimrim kita. Ingetlah maka lit Tuhanta si nuduhkan dalam, nikapken ras ngaturkensa kai siperlu man banta. Ula sempat kita kote ndalani kegeluhen enda. Anem gia lit nge si la bagi ukur tapi Dibata singaturkensa, janah eme si jadi gegehta bas proses kegeluhenta.

~ Dibata la pernah Tunduh ibas ngaturken kegeluhenta